

PRIMERA CARTA DEL APOSTOL SAN PABLO A TIMOTEO

1 ¹Che co jae Pablo. Che co jae Jesucristo jemimondo. Tumpa jare ñandeYa Jesucristo oyócuai che ayeapo vaera temimondora. Tumpa ñanemboasa jare ñaaro ñandeYa Jesucristo yayerovia reve. ²Aicutía cuae tupapire ndeve, Timoteo. Nde co jae cherai añetete vae ñandeporogüirovia re. ÑandeRu Tumpa jare ñandeYa Jesucristo tomee ndeve ipiacavi jare iporoparareco jare ipiacatu.

Omombeu moromboe mbaeti añete vae reta regua

³Epita Efeso pe, Macedonia coti aja yave che jae ndeve rami, reyócuai vaera amogüe vae agüiye vaera oporomboe ambué moromboe re. ⁴Iru vae reta omombeu aracae ndaye retaño jare jecuaño omoeracua mbae itenondegua reta pe oyeapo vae reguaño. Che jae ndeve reyócuai vaera vi agüiye vaera oyeapisaca jocuae nunga re. Echa oyeapisaca jese yave, omboipita oyoaca jocuae mbaembae re, jare jocatorai yave, ngaraa oyeócuai cavi Tumpa pe. Echa yayeócuai Tumpa pe mborogüirovia re.

⁵Jare jocatorai eyócuai, jae reta güinoi vaera mboroaü. Ñandepia oyeyoe yave mbaeyoa güi, jare yaicuaa yave mbaeti co yayapo icavi mbae vae, jare ñanoi yave mborogüirovia añetete vae Tumpa coti, ñanoita mboroaü. ⁶Erei amogüe vae oyavi cuae mbaembae. Jae rambue oñembojopa jare añave imiarieño. ⁷Jae reta oipota tei oporomboe mboroócuai re. Erei mbaeti oicuaa cavi mbae jei vae jare mbae imiari jese vae, yepe tei imiari jese oicuaa cavi vae imiari rami.

⁸Yaicuaa mboroócuai icavi co, oyeporu yave Tumpa oipota oyeporu vaera rami. ⁹Echa yaicuaa mboroócuai mbaeti co oyeapo mbaepuere güinoi vaera jupi vae reta re. Jaño oyeapo mbaepuere güinoi vaera mboroócuai jeigüe mbaeti oipota oyapo vae reta re, jare Tumpa jeigüe mbaeti oipota oyapo vae reta re, jare iyoa vae reta re, jare icavi mbae vae oyapo vae reta re, jare icavi mbae vae Tumpa coti jei vae reta re, jare tu oyuca vae reta re, jare ichi oyuca vae reta re, jare

opaete oporoyuca vae reta re, ¹⁰jare aguasa oyapo vae reta re, jare cuimbae reta oyupi oyopota vae re, jare oñomi japicha reta omee vaera corepoti re vae reta re, jare iyapu vae reta re, jare iru vae re oñeapo iyapu reve vae reta re, jare oipotagüe moromboe añete vae ndive oyovaicho vae reta re. ¹¹Cuae moromboe añete vae ñee icavi vae pegua co. Tumpa jecuaeño oyerovia catu jare oñemboeteuca ñee icavi vae rupi. Jae omombeu cheve ñee icavi vae, che amombeu-yoapí ye vaera.

Quirai Pablo oyeócuai ñandeYa pe

¹²Jare amee yasoropai ñandeYa Cristo Jesús pe imbaepuere omee cheve vae re. Jae oicuauca quirai chererovia catu. Echa omee cheve ayeócuai vaera chupe. ¹³Jocorai oyapo, yepe tei tenonde yave che jae icavi mbae vae ñandeYa coti, jare ayapo icavi mbae vae ñandeYa re güirovia vae reta pe, jare cherecopochi icoti. Erei ñandeYa cheparareco. Echa mbaeti aporogüirovia rambue, opaete cuae ayapo mbaeti aicuaa icavi mbae vae ayapo rambue. ¹⁴Jare ñandeYa omee cheve jeta yae ipiacavi. Jae ramiño vi omee cheve mborogüirovia jare mboroiu. Echa cuae reta ñanembae co Cristo Jesús re yarovia yave.

¹⁵Cuae co jae ñee ñandepuere yarovia catu vae, jare icavi co opaete vae güirovia vaera: Cristo Jesús ou cuae ivi pe omboasa vaera iyoa vae reta, jare che co jae iyoa vae reta itenondegua. ¹⁶Erei cuaera ñandeYa cheparareco. Echa che co jae iyoa vae reta itenondegua rambue, Jesucristo cheparareco yave, jae oicuauca quirai jae ipiaguasu tuicha yae co. Jare che co jae metei jaanga rami, iru vae reta vi oicuaa vaera ipuere güirovia jese, jae reta vi güinoi vaera tecove opa mbae vae. ¹⁷Ñamboete jecuaecuae aveiño ñandeRuvicha guasu opa mbae vae. Jae ngaraa etei omano jare mbaeti quia ipuere oecha. Jaeño co Tumpa. Amén.

¹⁸Cuae mbaraviqui re roócuai, cherai Timoteo. Echa jocorai tenonde yave nemombeu Tumpa iñee omombeu vae reta. Nemaendúa jocuae re, ndepuere vaera reñoraro cavi icavi mbae vae ndive. ¹⁹Eñemomirata ndeporogüirovia re, jare agüiye eyapo mbae reicuaa agüiyeta tei reyapo vae. Echa amogüe vae ñatei oyapo jocorai rambue, oñembojopa iporogüirovia re. ²⁰Corai oasa Himeneo jare Alejandro. Jae rambue mbaeti amaño jese reta oñemoiru vaera iru oporogüirovia vae reta ndive. Cuae jeco pegua ngaraa ndipo jei reta icavi mbae vae Tumpa coti.

Omombeu quirai oyerure vaera Tumpa pe

2 ¹Cuae rani jae peve: Oporogüirovia vae reta toyerure Tumpa pe opaete vae re, jare tomee yasoropai Tumpa pe jese reta. ²Jocorai toyapo mburuvicha guasu reta re, jare opaete mbaepuere güinoi vae reta re, yaico cavi vaera ñandepiacatu reve, ñandepuere vaera yayeócuai Tumpa pe ñamboete reve. ³Echa icavi co yayapo vaera jocorai, ñamboyerovia vaera Tumpa - jae co ñanemboasa vae. ⁴Jae oipota opaete vae oñemboasauca vaera jare oicuaa cavi vaera añete vae. ⁵Echa oime meteño Tumpa. Jae ramiño

vi oime meteño ipuere ombopiacatu ivi pegua reta Tumpa ndive vae. Jae co metei cuimbae Cristo Jesús jee vae. ⁶Jae oñemoeterenga omano vaera, ipuere vaera oepi opaete vae. Jare Tumpa oicuauca cuae, ara ou ma ovae yave oicuauca vaera. ⁷Jare ñandeYa cheparavo amombeu vaera cuae regua. Jae cheapo jemimondora, amboe vaera judío mbae vae reta mborogüirovia añete vae re. Cuae che jae peve vae añete vae co. Mbaeti etei co cheapu.

⁸Jae rambue aipota cuimbae reta oyerure vaera Tumpa pe opaete que rupi. Agüiye tipochi oyoupe jare agüiye toyoaca oyupi. Toyerure ipia icavi reve. ⁹Jae ramiño vi cuña reta agüiye tomonde temimonde ipora yae vae iru vae reta pe oechauca vaeraño. Agüiye toñemonde oñemboeteuca vaera iru vae reta pe. Agüiye vi toñoño ñañopea re mbaembae oro pegua jare ita ipora yae vae, jare agüiye tomonde temimonde jepi yae vae. ¹⁰Erei toyapo icavi vae. Echa amogüe cuña reta jei oyapo co Tumpa oipota oyapo vaera vae. Jae rambue icavi co jocuae nunga oyapo vaera icavi vae. ¹¹Cuña reta oñemboe yave, tiquiriri oñemomichi reve. ¹²Jare mbaeti amaño cuña re oporomboe vaera jare güinoi vaera mbaepuere cuimbae re. Tiquiririño. ¹³Echa Tumpa oyapo Adán rani jare jaicuere oyapo Eva. ¹⁴Jare Adán mbaeti itavi. Cuñaño itavi. Jare itavi rambue, cuña iyoa. ¹⁵Cuña reta jecuaño imembita oiporara reve, erei Tumpa oepita. Erei jecuaño toporogüirovia jare toporoai. Toñeñoño tee Tumpa peguara. Jecuaño toico cavi.

Quirai icavi oico vaera oporogüirovia vae reta itenondegua

3 ¹Añete co cuae yae vae: Oime yave quia oipota oyeapo oporogüirovia vae reta itenondegua vae, oipota oyapo mbaraviqui icavi vae. ²Jae rambue oporogüirovia vae reta itenondegua toico cavi, agüiye vaera quia omboeco mbae re. Togüireco meteño cuña. Toñeandu. Jecuaño toyapo icavi vae, oñemboeteuca vaera iru vae reta pe. Tiquirei omongaru vaera iru vae reta. Toicatu toporomboe. ³Agüiye ticause. Agüiye tiporonupase. Tipiaguasu. Agüiye tijovaichopota. Agüiye toipota iru vae reta imbaembae. ⁴Toyócuai cavi opaete jo pegua reta. Toyócuai cavi imichia reta, jae reta oyapo vaera tu jeigüe jare omboete vaera. ⁵Echa cuimbae mbaeti yave oicatu oyócuai cavi vaera jo pegua reta, ngaraa etei ipuere oñangareco Tumpa oiparavo vae reta re. ⁶Jare agüiye toyepo oporogüirovia vae reta itenondegua metei cuimbae güirovia ramo ñandeYa re vae. Echa jocorai oyeapo yave, güiramoi oñemboeteta, jare iru vae reta omboecota jocuae re, Tumpa omboeco aña guasu jae oñemboete yave rami. ⁷Jae ramiño vi oporogüirovia vae reta itenondegua tieracua cavi, oporogüirovia mbae vae reta imiari cavi vaera jese. Echa mbaeti yave jocorai, güiramoi jae reta omboecota, jare jocorai oporogüirovia vae reta itenondegua güiramoi oñemoamiriucata aña guasu pe.

Quirai icavi oico vaera iru oporogüirovia vae reta ombori vae

⁸Jae ramiño vi iru oporogüirovia vae reta ombori vae reta toñemboeteuca iru vae reta pe. Agüiye tiporombotavise. Agüiye ticause. Agüiye toipota yae corepoti iyeupeguara. ⁹Toicuaa cavi jocuae mbaeti opaete vae pe oyecuaa vae ñandeporogüirovia regua, jare agüiye toyapo mbae oicuaa agüiyeta tei oyapo vae. ¹⁰Eparandu rani jese jecocavi ra, jare mbaeti yave iru vae reta ipuere ovaie teco jese, ipuere oyeócuai Tumpa pe jorai. ¹¹Cuae reta jembireco vi toñemboeteuca iru vae reta pe. Agüiye tiyapu iru vae re. Toñeandu jare toico cavi, iru vae reta ipuere vaera güirovia catu opaete pe. ¹²Iru oporogüirovia vae reta ombori vae reta togüireco meteño cuña, jare toyócuai cavi imichia reta jare opaete jo pegua reta. ¹³Echa cuae reta oyeócuai cavi yave Tumpa pe, oñemboeteuca yae iru vae reta pe, jare ipuere imiari oquiye mbae reve mborogüirovia güinoi Cristo Jesús re vae re.

Oyecuaa ñandeve vae

¹⁴Añemongueta imambañe aja vaera ndepiri. Erei cuae mbaembae re aicutafá ndeve, ¹⁵reicuaa vaera quiraita reico Tumpa jentara reta ndive —jare reta co Tumpa jecuaño oico vae oiparavo vae reta —jare reta oñemomirata añete vae re jare oicuauca iru vae reta pe añete vae. Echa güiramoí apitata ima cuae pe. ¹⁶Añete co, ñanemopiacañi yae cuae ñandevño oyecuaa vae. Echa ñande yayeócuai Tumpa pe.

Tumpa oyeapo cuimbaera.

Espíritu Santo oicuauca jae co jupi vae.

Araigua reta oecha.

Jeracua opaete tenta pegua reta pe.

Ivi pegua reta güirovia jese.

Jae oñemboeteuca ara pe.

Omombeu yarovia vae güi oyerovata vae reta

4 ¹Jare Espíritu Santo omombeu ñandeve quirai ara taicuegua reta pe amogüe vae oyerovata yarovia vae güi. Jae reta güiroviata año oporombotavi vae reta jare moromboe año reta oipota güirovia vaera vae reta. ²Oporomboe reta yave, iyaputa oporombotavi vaera. Jare ngaraa ipiatiti jese, ipiatanta rambue. ³Oyocuita iru vae reta agüiye vaera omenda, jare oyocuita iru vae reta agüiye vaera jou mbae nunga tembú, yepe tei Tumpa oyapo ñandeve tembú yau vaera yasoropai ñamee reve chupe. Echa ñande yarovia Tumpa jare yaicuaa ma añete vae. ⁴Echa opaete tembú Tumpa oyapo vae icavi co. Agüiye ñaroiro mbae nunga tembú. Icavi co yau vaera yasoropai ñamee reve Tumpa pe. ⁵Echa oñeño tee co yau vaera Tumpa iñee jare yerure rupi.

Jesucristo pe oyeócuai cavi vae

⁶Remomaendúa yave ñanderivi reta cuae mbaembae re, reyeócuai cavita co Jesucristo pe. Jecuae eñemomirata ñee yarovia vae reta re jare moromboe añete vae regua re. Echa cuae reta re jecuaeño reico. ⁷Erei agüiye erovia aracaen daye reta tiaro reta omombeu vae. Erei eñemoatangatu reyapo vaera Tumpa oipota yayapo vaera vae. ⁸Echa ñanderete ñamongúe yave, michi peguaño icavi ñandeve. Erei ñañemoatangatu yave yayapo vaera Tumpa oipota yayapo vaera vae, jecuaecuae icavi yae ñandeve. Echa icavi ñandeve cuae ivi pe yaico rambueve, jare icavita vi ñandeve Tumpa piri ma yaico yave. ⁹Cuae co jae ñee ñandepuere yarovia catu vae, jare icavi co opaete vae güirovia vaera. ¹⁰Echa cuaera yaparaviqui ñai yaiporara reve, Tumpa jecuaeño oico vae re yarovia rambue. Jae co opaete vae omboasa vae. Jae omboasa güirovia jese vae reta.

¹¹Cuae mbaembae re eporoócuai jare eporomböe. ¹²Agüiye quia tanereroiro ndetairusu rambue. Erei jecuaeño nde rani eico cavi, iru oporogüirovia vae reta oicuaa vaera quirai icavi co jae reta vi yogüireco vaera. Jae rambue jecuaeño nemiari icavi vae re. Jecuaeño eyapo icavi vae. Jecuaeño eporoaiu. Jecuaeño erovia Tumpa. Agüiye eyapo mbae pochii vae. ¹³Che aja avae ndepiri rupi, jecuaeño eñemoatangatu remongueta vaera Tumpa ñee iru vae reta pe, jare reporomboaracuaa vaera, jare reporomböe vaera. ¹⁴Jecuaeño eñemoatangatu reiporu vaera mbota Tumpa omee ndeve vae. Echa oñemee ndeve Tumpa ñee omombeu vae reta jei rami, oporogüirovia vae reta itenondegua reta oñono yave ipo nderé.

¹⁵Jecuaeño eñemongueta cuae mbaembae re opaete ndepia reve, oyecuaa vaera opaete vae pe quirai icavi yae co reñemboe rei. ¹⁶Eñeandu reico cavi vaera jare reporomböe cavi vaera. Jecuaeño eñemoatangatu jese reta. Echa jocorai reyapo yave, reyeepita jare reepita vi oyeapisaca nderé vae reta.

Quirai omboaracuaa vaera iru oporogüirovia vae reta

5 ¹Agüiye eñeengata ndechi reta pe. Erei emboaracuaa, metei cuimbae omboaracuaa tu rami. Jare emboaracuaa cuimbae taiirusu vae reta, metei cuimbae omboaracuaa tivi rami. ²Emboaracuaa tiaro reta, metei cuimbae omboaracuaa ichi rami, jare emboaracuaa cuñatai reta, metei cuimbae omboaracuaa jeindi rami. Agüiye ere mbae pochii vae chupe reta.

³Emböri imemano vae reta mbaeti etei yave güinoi quia omböri vaera. ⁴Erei imemano vae oime yave güinoi imemböi reta ani jamariro reta, jae reta rani tomböri, oicuauca vaera oyeócuai co Tumpa pe. Echa imemano vae jae reta jentara co. Jocorai toyapo reta omboecovia vaera ichi jare iyari oyapo chupe reta vae. Echa jocorai oyapo yave, omboyerovia Tumpa. ⁵Erei metei imemano vae mbaeti etei quia güinoi omböri vaera vae co jae metei añetete imemano vae. Jae güirovia Tumpa, jare jecuaeño oyerure chupe pitu rupi jare ara rupi. ⁶Erei imemano vae oico yave oñemboyerovia vaeraño, mbaeti

etei oyeócuai Tumpa pe, metei omanogüie vae mbaeti etei ipuere oyeócuai iru vae pe rami. ⁷Jae rambue cuae mbaembae re eyócuai oporogüirovia vae reta, agüiye vaera quia omboeco reta mbae re. ⁸Erei oime yave metei oporogüirovia vae mbaeti oñangareco jo pegua reta re jare iru jentara reta re vae, mbaeti echa oporogüirovia. Jeta oporogüirovia mbae vae reta oyapo cavi yae chugüi. Echa jae reta oñangareco jo pegua reta re jare iru jentara reta re.

⁹Agüiye emoiru imemano vae iru imemano vae reta ndive ndei sesenta año güinoi mbove. Sesenta año güinoi yave ramo emoiru jae reta ndive mbaeti yave imegua, ¹⁰jare iru vae reta omoeracua yave icavi vae oyapo co, jare oñangareco cavi yave michia reta re, jare omongaru yave mboupa reta, jare oyeócuai yave oñemomichi reve iru oñeño tee Tumpa peguara vae reta pe, jare ombori yave oiporara vae reta, jare oñemoatangatu yave oyapo vaera icavi vae.

¹¹Erei agüiye emoiru tairusu imemano vae reta iru imemano vae reta ndive. Echa cuae nunga oipota yave iru cuimbae, mbaeti ma oipota oyeócuai Cristo pe iru imemano vae reta oyeócuai chupe rami. Jaeño oipota omenda.

¹²Jae rambue güinoi teco. Echa mbaeti ma oyapo tenonde yave güirocuavee oyapo vaera oporogüirovia vae reta pe vae. ¹³Jae ramiño vi oyeapo iyaqui vaera jare opoupouño. Jae ramiño vi oporoangao jare iru vae jemiapo re oñangareco. Imiari mbaembae agüiyeta tei imiari jese vae re. ¹⁴Jae rambue aipota tairusu imemano vae reta omenda ye vaera. Icavi co imembi vaera jare oñangareco cavi vaera jo pegua reta re. Agüiye toyapo mbae icavi mbae vae, agüiye vaera oyovaicho Cristo ndive vae ipuere omboeco mbae re.

¹⁵Echa amogüie vae oyerova ma oyapo vaera Satanás oipota oyapo vaera vae.

¹⁶Metei cuña oporogüirovia vae jentara ime omano yave, oporogüirovia vae tombori imemano vae, agüiye vaera imemano vae oyeco iru oporogüirovia vae reta re jae reta ombori vaera, jae reta ipuere vaera ombori iru imemano vae mbaeti etei jentara güinoi ombori vaera vae reta.

¹⁷Jupi co oporogüirovia vae reta itenondegua Tumpa iparaviqui oyapo cavi vae reta oñemboeteuca vaera jare iru reta omboepi vaera chupe reta. Jae ramiño vi jupi co oporogüirovia vae reta itenondegua Tumpa iñee omombeu jare oporomboc vae reta oñemboeteuca yae vaera jare iru reta omboepi vaera chupe reta. ¹⁸Echa Tumpa iñee pe oyecuatía oi corai: “Güeye trigo ombopiriri oi yave, agüiye eiyuruocua”. Jare: “Jupi co omombaraviqui vae omboepi vaera oparaviqui vae pe mbaraviqui oyapo vae”. Jorai oyecuatía oi.

¹⁹Oime yave quia metei oporogüirovia vae reta itenondegua mbae re omboeco vae, agüiye eyeapisaca jese mbaeti yave ipuere imiari mócoi ani mboapi oicuaa cavi jeco regua vae. ²⁰Iyoa vae reta pe ere iyoa co opaete vae jovaque, iru vae reta oquiye vaera mbaeyoa oyapo vaera. ²¹Che roócuai Tumpa jare ñandeYa Jesucristo jare araigua reta Tumpa oiparavo vae jovaque: Cuae mbaembae jecuaño eyapo, jare agüiye eaiu metei vaño iru vae güi. Oyovaque reve eyapo opaete vae pe. ²²Agüiye neangueco eyapo

oporogüirovia vae reta itenondeguara, agüiye vaera reñemoiru iru cuimbae reta ndive imbaeyoa reta re. Agüiye eyapo mbae pochii vae.

²³Jecuaecuaño nderie pe nembraerasi. Cuae jeco pegua vino jeu mbovi. Agüiye iño jeu.

²⁴Amogüe vae imbaeyoa reta tenonde voi oyecuaa cavi jare oicuaa quirai oñejaucata co. Iru vae reta imbaeyoa reta oyecuaata taicue rupi.

²⁵Jae ramiño vi icavi vae amogüe vae oyapo vae tenonde voi oyecuaa cavi, jare icavi vae mbaeti añave oyecuaa vae vi oyecuaata co.

6 ¹Opaete oyeócuai iya pe vae reta toamboete iya, agüiye vaera iru vae reta jei icavi mbae vae Tumpa coti jare ñaneporomboe coti. ²Jare iya oporogüirovia yave, chupe oyeócuai vae reta agüiye togüiroiro. Echa güiramoí oñemonguetata güiroiro vaera, iya vi oporogüirovia rambue. Erei oyeócuai vae reta toyeócuai cavi iya pe. Echa iya vi güirovia ñandeYa re, jare ñandeYa oaiu. Jare icavi yaeta co iya pe, jembíócuai reta oparaviqui cavi yave chupe. Cuae mbaembae re eporomboe jare eporomboaracuaa.

Yayeócuai Tumpa pe ñandepiacatu reve

³Güiramoí iru vae oporomboeta ambué moromboe re, jare ngaraa güirovia moromboe añete vae, yepe tei moromboe añete vae co jae ñandeYa Jesucristo regua. Echa jocuae moromboe añete vae ñanemboe quirai yayeócuai vaera Tumpa pe. ⁴Erei jocuae nunga oporomboe vae oñemboete co, jare mbaeti co mbae oicuaa. Echa jecuaño oyoaca. Jare cuae mbaeti co icavi. Jae rambue oñemoagüiro, jare oñoraro, jare jei icavi mbae vae, jare oñemongueta quirai iru vae reta oyapo icavi mbae vae. ⁵Jocuae nunga oyoacaiño mbae icavi mbae vae re. Iñemongueta mbaeti isimbi vae. Jae reta mbaeti etei oicuaa añete vae. Oñemongueta tei ipuere oyeócuai Tumpa pe oicocatu vaera. Agüiye eñemoiru jocuae nunga ndive. ⁶Erei yayeócuai yave Tumpa pe, icavi yae co ñandevera, yaico yave ñandepiacatu reve. ⁷Echa yaa ñandesí güi yave mbaeti etei mbae ñanoi. Jae ramiño vi ñamano yave ngaraa etei mbae ñanoi. ⁸Jae rambue ñanoi yave añave ñanerembiura jare ñaneremimondera, ñandepiacatu reve yaico. ⁹Erei mbaeti yavai oipota oicocatu vae reta iyoa vaera. Mbaeti yavai añã guasu oipii reta vaera. Jae rambue jae reta oñemongueta cavi mbae reve oipota yae jeta mbaembae mbaeti etei icavi chupe reta vae. Echa jocuae nunga mbaembae pe oñemocañitei reta. ¹⁰Echa corepoti oipota yae vae oyapo opaete mbaembae icavi mbae vae. Jae amogüe vae oipota yae oicocatu rambue, oñemombia mborogüirovia ñandeYa regua güi, jare iñemongueta jasi ma chupe metei ui ñaneñivo yave jasi ñandevera rami.

Tanta eparaviqui Tumpa pe

¹¹Erei nde co jae cuimbae Tumpa pe oyeócuai vae. Jae rambue agüiye etei eyapo jorai. Erei eipota yae eyapo jupi vae jare eyeócuai Tumpa pe. Jae

ramiño vi eipota yae mborogüirovia, jare mboroiu, jare mbiaguasu, jare ñemomichi. ¹²Jecuaño eparaviqui tanta reiporara reve yarovia vae re. Eipi tecove opa mbae vae. Echa cuaera Tumpa ndeparavo. Jare remombeu cavi ma ndeporogüirovia jeta oyeapisaca nderé vae reta pe. ¹³Cuae re co che roócuai Tumpa jovaque. Echa jae ome tecove opaete pe. Roócuai vi jese Cristo Jesús jovaque. Echa jae omombeu cavi añete vae regua Poncio Pilato jóvai. ¹⁴Jecuaño eyapo cuae che roócuai jese vae. Jorai reyapo yave, ngaraa mbae icavi mbae vae reyapo, jare ngaraa quia ipuere nembroco mbae re, ñandeYa Jesucristo ou ye regua. ¹⁵Echa ara ou ovae yave, Tumpa ochaucata co ñandeYa Jesucristo. Tumpa jecuaño oyerovia catu. Jaeño co opaete vae iYa. Jae co mburuvicha guasu mbaepuere tuicha yae vae güinoi vae. Jae imbaepuere tuicha yae co opaete iru mburuvicha guasu reta imbaepuere güi. Jae co opaete ivi pegua reta iya reta iYa. ¹⁶Jaeño co mbaeti etei omano vae. Jae oico tembipe oia pe. Mbaeti quia ipuere oya jocuae tembipe re. Mbaeti etei quia oecha Tumpa, jare mbaeti etei quia ipuere oecha. Toñemboeteuca Tumpa jecuaecuae aveño imbaepuere tuicha yae vae jeco pegua. Amén.

¹⁷Eyócuai cuae ivi pegua mbaembae re oicocatu vae reta agüiye vaera oñemongueta iyee icavi yae paravete vae reta güi, jare agüiye vaera oyeco icorepoti re. Echa güiramoi imambae omocañita. Erei toyeco Tumpa jecuaño oico vae re. Echa jae ome ñandeve opaete mbaembae yayerovia vaera. ¹⁸Jare eyócuai vi toyapo icavi vae. Echa jorai yave, oicocatuta co Tumpa coti icavi vae oyapo vae re. Jecuaño tiquirei ome vaera güinoi vae güi iru vae reta pe, ombori reta vaera. ¹⁹Echa jorai oyapo yave, güinoita mbae icavi vae mbaetita ocañi vae ara outa vae reta peguara, jare oipiita tecove opa mbae vae.

Pablo jaeño ma oyócuai Timoteo vae

²⁰Timoteo, jecuaño eñangareco cavi jocuae oñemee ndeve reñangareco vaera jese vae re. Agüiye eyeapisaca araca ndaye reta re. Echa mbaeti mbae oipota jei. Agüiye erovia Tumpa ndive oyovaicho vae reta jei tei oicuaa cavi vae. Echa mbaeti co mbae oicuaa. ²¹Echa amogüe jei tei oicuaa cavi vae oñemombia yarovia vae güi.

Tumpa tomee ndeve ipiacavi. Amén.